

Først vil eg berre sei; Gratulerer med dagen!

Eg heiter Susanne Sævdal Bere og eg representerer Radøy ungdomsråd. I år har ungdomsrådet representantar på alle dei fira plassane på Radøy som får gleda av å sei nokre ord når me skal legge ned minnekrans på nasjonaldagen.

Eg synes det er veldig fint at me begynner 17. mai her ved minnesmerket på Sæbø. Det minner oss om at fridommen og sjølvstendet me feirar i dag har hatt og fortsatt har sin pris. Det kan vere vanskeleg å førestille seg at Noreg ein gong har vore i krig og det gjer inntrykk på meg som ung å få halde ein tale som heidrar dei som falt under krigen. Dei hadde heile livet framfor seg og nokre av desse var svært unge, men ofra alt for landet sitt. Det å måtte kjempa for dei rettighetene me i dag tar for gitt, må ha vore svært vanskeleg.

I Noreg i dag er me så heldige at me ikkje treng å kjempe denne kampen, fordi dei kjempa den for oss. Men det er fortsatt viktig at me ikkje tar denne fridommen for gitt, fordi desse soldatane me heidrar, kjempa nettopp for at me skulle leve i eit fritt land.

Draumen til desse falne om eit fritt Norge er grunnlaget for den nasjonen me kjenner i dag, eit samfunn der alle kan føle seg trygge og der me vert tatt vare på gjennom eit godt velferdssystem, skulesystem og eit demokratisk styresett. Me tenker kanskje at dette er noko sjølvsgt, men for mange i verda er det ein dagleg kamp å overleve og få stemmen sin høyrd.

Det er viktig at me verdset fridomen, moglegheitene og rettighetene me har, og byggjer vidare på dei ideala Noreg står for gjennom å vere engasjerte, rause, omsorgsfulle, opne og takknemlege. Det er viktig å vere takknemleg. Me har trekt vinnarloddet i livet og bur i eit av verdas rikaste og beste land. Så i staden for å heile tida fokusere på det me er misfornøgd med, så må me heller tenke på alt det gode me har og kor heldige me er som bur i Norge.

Eg takkar for at dykk har høyrd på mine tankar, no på starten av festdagen vår. Me skal avslutta med å leggja ned Radøy kommune sine minnekransar og oppretthalde tradisjonen ved å minne dei som gav livet sitt i kampen for eit fritt Noreg.

